



Remo Cavegn-Wasescha cun la sportista giuvna da l'onn, la freeskionza Giulia Tanno.

FOTOS G. N. STGIER



Il star da hockey Nino Niederreiter (san.) cun il judoka Flavio Orlik.



Il promotur da sport Gian Gilli (san.) cun il skiunz Gino Caviezel.

# Per intgins tuttina ina surpraisa

Cuira: Notg da sport grischuna

DA GION NUTEGN STGIER / ANR

■ **Elena Könz, la snowboardista da Vnà, è la sportista grischuna da l'onn 2015. Undrada è er vegnida Giulia Tanno, la freeskionza da Lai. Ultra da quai ha er la unihockeyanera Seraina Ulber da Lantsch retschet in premi per sias bunas prestaziuns sportivas.** Il titel sportist grischun è vegni surdà l'emprima giada il 1992 e quai a la pattinunza *Barbara Hunger*. Dapi 16 onns undrescha dentant la Federaziun grischuna per sport sportists e sportistas ed a medem temp vegn er elegi il sportist ubain la sportista da l'onn. La notg da sport, quella è betg uschè veglia ed è vegnida introducida il 2012. Quella occurrenza è lura la saira da las sairas, nua che la prominenz da sport e da la politica s'inscuntra. Venderdi ha gi lieu en l'Auditorium da la Banca chantunala la quarta ediziun da la notg da sport grischuna e danovamain è ella stada en tuttas modas e manieras in vair success.

## La vetrina actuala dal sport

Al timun da la Federaziun grischuna per sport stat *Remo Cavegn-Wasescha* da Panaduz. En ses pled da bainvegna ha il president ditg che la notg da sport saja la vetrina actuala dal sport grischun. El è er sa mussà ventiraivel che danovamain saja ina societad illustra suandada l'invitaziun e vegnida en rotscha a la notg da sport 2015. *Martin Jäger*, il cusseglier governa-

tiv e minister da sport, ha intima las uniuns ed ils clubs da sport per anc dapli collavuraziun. Grazia a la collavuraziun pli stretga saja er pussaivel da realisar ina tscherta infrastruttura da sport. Dal chantun Grischun van tuttina mintg'onn radund set milliuns francs a favur dal sport.

## Tschintg sportists e trais sportistas

Sin proposta da las diversas federaziuns da sport aveva l'uniun tetgala nominà tschintg sportists e trais sportistas che vegnan en dumonda per il titel sportist grischun 2015. Per la tscherna da quel quintan 50% da las vuschs entras il voting electronic dal public ed ils auters 50% entras la giuria. Tar ils umens eran nominads: *Andreas Ambühl*, il chapitani dal HCD, *Jonas Baumann*, il passlunggist da Schons, il skiunz *Gino Caviezel*, l'alpinist *Gian-Luca Griching* e *Flavio Orlik*, judoka. Las trais dunnas nominadas eran: la specialista da cursa lunga *Seraina Boner*, la snowboardista *Elena Könz* e lura *Seraina Ulber*, la chapitana dal Club dad unihockey Piranha Cuira. La tensiun era davairas gronda durant l'entira saira e tar la maioritad dals preschents era *Andres Ambühl*, l'actual campion svizzer da hockey il favorit per daventar sportist da l'onn. Uschia era er cusseglier dals chantuns *Stefan Engler* persvas ch'il star dal HCD gudogna la concurrenza. Pero er *Seraina Ulber* cun ses palmares da

tschintg giadas campionsessa svizra aveva er numerus fans che tegnevan per ella ils poleschs. Per uschenumnads insiders era *Elena Könz*, l'actuala campionsessa mundiala da snowboard en la disciplina «Big-Air» quella sportista che merita il pli fitg quella onur.

## Stada ferm surstada

*Elena Könz* è stada fitg surstada da sia tscherna sco sportista grischuna da l'onn 2015. Per la snowboardista da Vnà è quai in ulteriur grond success en sia carriera. Ella saja er loscha da purtar da nov quel titel sco ses antecessurs *Sandro Viletta*, il campion olympic, *Nino Niederreiter*, il hockeyaner da la NHL e lura er *Elias Ambühl*, il freeskionz. Vicesportista grischuna da l'onn è daventada *Seraina Ulber*, la unihockeyanera da Lantsch. Er ella er pli che be ventiraivla ed ha manegià che quel premi saja bain ina onur, merità quel avessia dentant l'entira equipa da Piranha Cuira. Plaschair dal terz post tar quella tscherna ha er già *Andres Ambühl*, l'antierur vicecampion mundial da hockey. El è insumma betg stà dischillus da betg avair gudagnà quel titel, persuerter tut quels ch'eran persvas che be el merita quel titel. Il team da quest onn è il Club da nudar Cuira, il funzionari da sport 2015 è l'antierur lutgader *Karl Ritter*, sportista giuvna da quest onn è la freeskionza *Giulia Tanno* e *Jeremy Jenal* è il nov sportist grischun tar ils impedids.



Seraina Ulber è stada accompagnada da sia mamma Laetitia Ulber.



Da la partida a la saira da sport è er stads Silvano ed Edwina Beltrametti-Parpan.



Toni Livers e sia partenaria Seraina Boner.